

## sankt florian song

Text: Hans Jürg Zingg  
Melodie: Norbert Schultze (Lili Marlen)  
Begleitung: Anton Karas

[s kreiset e legände um e diamant  
schwäbt es wulkeringli rosig übrem land

liebi lüt dä heilig schyn  
ghört am sankt florian o piin  
di andere nid mir hei dr dräck  
di andere nid mir]<sup>1</sup>

hüür vor füzgig jahre - heit er s ou vrnoh  
sy mir prima gfahre mit export und so

ds füdle voll guld u ds härz us diamant  
hei mir gse zämebräche land um land  
di andere nid mir sy dracho  
di andere nid mir

zringsetum hets krachet zringsetum hets bbrönnt  
nei mir hei nid glachet heis ou niemmrem ggönnt

wäre doch gärn aschtändig gsy  
aber gschäft isch gschäft me rütscht so dry  
di andere nid mir makes süsch  
di andere nid mir

waffe hei mir ghandlet diskret i grossem schtil  
roubguld hei mir gwäsche vil schöner als persil

wär het em hitler entgäge gha  
uf em schlachtfäld gruusig ds läbe ggla  
di andere nid mir sy vrreckt  
di andere nid mir

mies geits hüt no mängem kei wonig u ke pass  
mänge schtürchlet zil- u hoffnigslos dür d gass

hotel diamant besetzt tut uns leid  
die tore zu wie schon seinerzeit  
di andere nid mir schtö duss im seich  
di andere nid mir

(1989)

Erstveröffentlichung: Kaktus 7 vom 4. Oktober 1989

---

<sup>1</sup> Diese Eingangsstrophe kam mir erst später in den Sinn – leider! – deshalb fehlt sie in der Radioaufnahme.

